

摘藻堂四庫全書薈要

集部

欽定四庫全書薈要

集部

御選明詩卷四十

詳校官原任主事_臣李斯咏

欽定四庫全書薈要卷一萬八千五百四十

集部

御選明詩卷四十

七言古詩五

題江雪川長江圖

卞同

長江悠悠急於箭一碧無聲瀉晴練寂莫秋容雨後看
依稀颿影煙中辨白鳥雙飛意自閒茅屋小住長蘆灣
殘霞紅明晚天曙落木慘淡秋風還分明記得經行處

鸚鵡洲前久呼渡多少天南地北情展圖一晌空凝竚

呂不用

題顧雲屋雲山圖

我識東吳顧文學早歲丹青動黃閣揮毫得意傲王侯
霜刮虬髯面如削一自塗窮悲落旅食南州夢非昨
蛟龍為魚氣鬱勃散作春雲滿丘壑乾坤無地著茅茨
寫向雲根亦奇作荒林日色曉蒼涼古木風聲晚蕭索
首陽蕨根秋土深商嶺芝苗今寂寞看圖為問人何在

晚交注意歸猿鶴

劉綱

鶴林詩

鶴林羽士金門客舊闢丹房鍊瓊液手栽千樹虬髯松
坐對兩山虎頭石白雲晝靜豁巖扉濕翠滿堦生紫芝
瑤琴自奏澗湍響銀河直掛瀑泉飛鼎鑪存火烹鉛汞
靈藥成苗幾時種皓鶴翎梳雪翳林碧桃花落霞飄洞
琳宮紫闕想蓬萊疊嶂連峯紫翠堆丹光穿壁如紅日

應有仙人騎鶴來

梁蘭

寄劉珪

春日已多夏日臨
鉤輅晝啼苦竹深
野棠雨餘新水綠
石壁樹杪浮雲陰
安知天地有終極
不覺歲月還相侵
我思劉郎何可見
徒使遲迴勞寸心

陳川

題夏珪溪山清遠圖

我來東南丘壑好曲折雲林護危杪澗沙流水春自香
石楠碎葉秋如埽縛柴野橋松雨涼鳴鐘破寺茶煙香
山椒茅亭如笠大石脚漁舟似瓢小人家制度太古前
雞犬比鄰往還少酒杯吹香小店門落日漁樵多醉倒
六年不歸長夢見白髮忘情負魚鳥晴牕見畫三摩挲
舊夢微茫今了了不知何處得此圖覺我山居殊草草
安得溪南寫石田便攜妻子從茲老

董遠

城頭烏示良夫

城頭擊柝邊月低啼烏繞樹寒不棲天邊明星白如日
空階落葉風淒淒房帷靜悄夜何永青燈無眠照孤影
蟪蛄在戶人未還關河十月衣裳單

謝常

讀醫士王立方瘦老子傳求歌賦此

瘦老子吳門生雙瞳碧醵骨有稜形臞力弱須杖行草
堂卧病留不得聲名早動金門客走書遠至闔閭城起

躡芒履強匐畝春風放舟東海邊相知喜遇王侯賢聞

言太液間弱水迺云自致非由天當年挾書躋華嶽八

尺青藜手中握窮探極討竟忘疲飢骨秋清宛如鶴有

時醉夢羅浮村冷香細和明月吞綠么啼春呼不醒脩

然化作梅花魂後來尋師江海外扣舷足踏金鰲背神

枝采得賦歸來鐵舟機觸鯨牙碎生平非慕賈浪仙苦

吟寂寞空逃禪前呵不識京尹至騎驢高聳雙吟肩又

不學東家沈郎愁萬斛老大為官恨羈束帶圍頻減不

勝衣吟腰瘦得無纖肉侯聞此語驚且憐異方豈惜千金傳試斟清泉煮石火佇看健步如飛鳶歸來著書脩藥裹竹房閒把秋雲鎖相逢湖曲看青山恍若杜陵遊飯顆君才君名何太奇此生不愧賢侯知淨觀著傳三歎息絕憐我輩空肥痴

潘子安

題畫

岷峩雪消春水急瀟湘雨餘雲樹濕迢迢翠嶼孤鶴迴

湛湛珠宮老蛟泣
征帆數點風濤中
出沒不計天西東
鄉關杳渺在何處
矯首遙送雙飛鴻

朱友諒

周玄初禱雨詩

道人鞭龍出潭底
黑雲一片山頭起
仰看紅日不見光
黑龍頭搖白龍尾
有時登壇步七星
一呼一吸成雷霆
白波翻空海水立
銀河落地天瓢傾
去年京師禱雨雨
輒至大田小田總
霽霽定知夜半拜
封事自有精誠感

天地王公貴人知其賢屈師闡教來琴川今年旱魃又
為虐禾稼半死民熬煎縣官投詞庶人跽道人受命應
且喜笑書鐵牌役海鬼疾驅一百五十里甘泉龍居萬
丈深神符召集如飛矢今朝雨脚來自南半是吳江四
橋水頂山有龍名太白口喚湖水成甘澤道人驅龍喝
龍出五雷使者閒不得龍兮龍兮一喚日失色金蛇電
掣光千尺再喚山氣黑飄風盤旋走沙礫上天有寶不
愛惜噴下驪珠千萬石兩龍行雨勢未休須臾潦水平

田疇疲農入城報沾足道人一笑山雲收

潘翥

讀雪篷集

人中儀表黃東阿華詞藻辯如懸河秋波千頃撓不濁
但覺四坐春風和早年通籍絲綸閣詔選儒臣拯民瘼
百里柯亭棲鳳鸞一麾古鄆翔鵬鶚交陳百務情非愆
偶蹶霜蹄衆所憐歸來倅領文翁鐸回首傷心叔夜絃
朝夜開卷披光彩一似驪珠照滄海弟子誰為宋玉招

故人獨有山公在，愁來翹首悵東津。
海水潺潺海上昏，惟有白雲山萬疊。
百年從此憶清塵。

方孝孺

題李白對月圖

明月出高樹上懸青天，中下有萬頃之長江。
揚波泛彩青若空，江風吹人色淒凜。
此時對月誰能寢，十千斗酒何足論。
舉杯宜就花前飲，花前飲酒無與儔。
酒酣意氣輕王侯，仰招行雲不可得。
但見月與河漢俱西流，仙人

伐桂樹玉女倚瓊樓顧盼暫相悅棄去終莫留昨日已
浩浩今日復悠悠人生如飛光及時不飲空白頭君不
見月中玉兔搗靈藥不能醫此萬古愁何如醉卧長不
醒天地與我同虛舟混混六合間浩然何所求

題南屏對雪圖

昔年歲暮京國還艤舟夜宿南屏山山風吹雲天欲壓
夜半大雪埋江關清晨倚樓望吳越六合玉花飄未絕
恍疑江水駕山來萬頃銀濤涌城闕山僧好事喜客留

置酒開筵樓上頭玉堂仙人宋夫子紅顏白髮青貂裘
坐談古今如指掌共看雲收月華上寒輝素彩相盪摩
碧海瓊臺迭蕭爽酒酣擊節心目開慷慨弔古思英才
荒祠古栢岳王墓廢湖殘柳蘇公堤一時嘉會難再得
仙人上天塵世窄王子何年繪此圖正貌南屏舊遊迹
吾知王也奇崛人新詩妙墨俱絕倫偶然揮洒豈無意
神授髣髴存天真世間今古同飛電回首人豪都不見
空有蘿山石室書夜夜虹光射霄漢

題王叔明墨竹為鄭叔度賦

吳下王蒙藝且文吳興趙公之外孫黃塵飄蕩今白髮
典刑遠矣風流存華亭朱芾稱善畫每觀蒙畫必歎詫
謂言妙處逼古人世俗相傳倍增價昔年夜到南屏山
高堂素壁五月寒壁間舉目見修竹煙雨冥漠蛟龍蟠
呼童秉燭久不寐細看醉墨王蒙字固知蒙也好天趣
畫師豈解知其意分枝綴葉人所知要外枝葉求神奇
天機貴足不貴似此事不可傳諸師麟溪鄭君好奇士

愛畫猶能賞其趣嗚呼世間作者非不多鄭君甚少可奈何

為玉泉山人題

天池直接扶桑東百川委會來無窮兩崖為門障海口
大江中流潮汐通豐山橫驚東奔放浪啣沙崖穿玲瓏
翠鳳飛來白銀闕金鰲飛出金蓮宮天台赤城此磅礴
間氣往往生英雄鴻儒碩士世不乏神靈秀異天所鍾
玉泉山人獨嗜古食貧力土耑而工結廬椒江望蓬島

坐看海氣浮青紅含嚼英華嗽芳潤吐納光景噓長虹
羣仙窈窕羅几席洪波浩瀚涵心胸最爾一鄉不滿意
邈焉四海將奚從日披黃卷對賢聖工並周孔齊義農
國風雅頌導于正典謨訓誥操厥中權謀勢術競趨利
玄談清議咸歸空濂洛崛起樹名教千載道學開盲聾
仁義行師佐伊呂禮樂出治登夔龍拯救生民布仁化
此心炯炯今昔同食息夢寐若見之上下議論相磨礱
論交豈止一世士直追三代還淳風屈伸去就隨所遇

仕止進退皆從容某山某水吾釣遊歸來舊隱巢雲松
覽以德用中二友和東坡喜雨之作

席前衿佩多如雨危坐談經亦良苦講堂日晏未朝餐
舌卷唇黑面生土小齋退食聞扣門倒屣起迎咽還吐
知是兩賢送詩至笑却杜康麾陸羽錢也駿馬氣莫當
陳也奔泉勢難禦元祐詩壇不易登俱欲升堂啟其戶
文章繇來關政教道術何曾間今古每憐陋儒不自量
詆訶前人竟奚補浪與唐宋較優劣有如癡兒侮厥母

蘇公風骨真天人駭視四海手摩撫二南洋溢騶虞出
九韶鏗鏘鳳凰舞列仙得道行御風漢相閑居老食乳
神奇變化脫邊幅怒罵嬉戲皆新語眼中不復見此翁
雲月江山澹難主我狂自少喜翰墨辟若情農服田畝
歎彼么麼星辰出望公光燄日當午二公豪健敢扳附
蓄積穰穰富倉庾大篇屬和意有餘坐覺詩名動城府
當今聖朝任英俊雅頌再作聲教普吾衰才薄子勉旃
振起斯文繼前武

練子寧

三月望日與饒隱君子宏遊玉笥山

我懷謝康樂獨往遊名山身同雪舟繫心與浮雲閒清
風澹蕩灑六合令我興在雲松間玉山高與南斗齊雲
錦照耀廬山低三十六峯凌虹霓飛湍噴雪臨迴溪長
松挂月青猿啼上有梅仙采藥之幽棲下有蕭雲讀書
之故基洞天石扇杳莫測瑤草謾長三春萼我欲因之
覽八荒手拂青蘿眠石牀迴飈吹散碧天霧清冥倒瀉

澄湖光作為玉山謠寄之雙峯客興來攜妓秋復春笑
殺東山謝安石

水竹居詩

高人結宇修篁裏軒戶玲瓏映流水庭臯月轉翠陰生
溪上風迴青浪起翠陰青浪映窗扉曲徑臺深客到稀
林下移牀揮麈坐沙頭繫艇釣魚歸柴門無事臨流敞
高卧支頤聽清響千山暮雨石泉通一夜春雷籜龍長
几席清幽俗事疎波光盡日映圖書何年得遂辭塵塊

杖策相從此卜居

程本立

題竹石小畫

玉堂仙人松雪公寫竹正似石室翁雲林道人雖後出
往往落筆生秋風吳人好書仍好畫百年遺墨千金價
比來何處得此圖松雪雲林此其亞娟娟嫩玉纔數莖
煙梢雨葉縱復橫洞庭寒骨沈水底鐵索下取蛟龍爭
却憶江南舊池館筆牀棋局何蕭散一行作吏筆便廢

十年不歸夢欲斷松雪子孫今幾人
雲林弟子誰逼真
得歸故鄉倘相覓竹枝挂我頭上巾

合州

合州樓前江水合合州樓外青山匝
倚樓西望雨冥冥
順水舟來飛兩楫閬中山水天下稀
不如合州可忘歸
街頭彷彿吳門市人家瓦屋白板扉
買魚沽酒醉今夕
相逢誰是吳門客雞鳴風雨夢初醒
鄰機軋軋村舂急

銅梁縣

銅梁縣庭公事少銅梁縣市官橋小上山下山石作街
街南街北人家好人家好農不好商婚男嫁女不出鄉
香芹煮羹飯有稻木綿紡絲衣有裳陳郎邀我清樽滿
情多已覺迴鞭懶酒酣欲寫銅梁歌百錢買筆紫羅管

唐之漳

題高氏挹翠樓

疏樓壓渚玻璃光玉沙粼粼生象牀回塘雜華結春霧
江女濯錦胭脂香東風夜入蒲芽紫暖綠搖空一千里

倚極晴闌泛灩明并刀剪得銀河水水窮雲闕露微嵐
遠碧斜飛十二簾日晚愁吹簫底月小龍行雨過江南

李龍眠畫雪中捕魚圖

玉龍行空不成雨首觸銀河落秋浦帝遣神工種白榆
皓鶴飛來老鵬舞榜兒踏船依楚竹不釣齊璜餌荆玉
波寒月黑大星稀萬斛驪珠豈勝掬夜闌緘素服麻姑
桑下塵飛海欲枯何如去作蓬萊主五城不夜無寒暑

龔詠

梅花莊詩為朱明仲賦

先生卜築吳城曲，賸種梅花繞吟屋。自期歲晚供詩料，
豈慕平泉與金谷。花開時節天正寒，雪花亂灑迷林壑。
杖藜引鶴飽幽翫，不與梨雲同夢看。歸來袖手寒窗坐，
石鼎有茶爐有火。神交不覺兩忘情，誰是梅花誰是我。
為彥中題畫

青山之青如佛頭，白雲化作寒泉流。世間塵土飛不到，
眼中景物俱清幽。若人自是好靜者，豈非五柳先生儔。

每托琴樽寫高興
脫屣樂從魚鳥游
却笑時人苦不達
漏盡鳴鐘猶未休
君不見小虞塘西
玉峯下一菴已遂
吾菟裘共論心事
肯相過斗酒當為
山妻謀

寓意

天上雙星有常處
夫為牛郎婦為女
東西相望自年年
只隔天津一泓許
耕田匪易織亦勞
不得從容相慰語
傷心一掬淚如珠
灑向人間作秋雨

解縉

題山水

溪山有逸趣蒼厓凌紫煙遠峯落天半中有飛來泉蒼
茫樓觀出林杪丘園四顧居人少夕陽往往見漁樵古
樹陰陰亂啼鳥望中峯高雲錦張如此溪山猶故鄉玄
潭觀裏三峯出白鷺洲邊二水長碧梧翠竹連江岸菊
潭秋嶼花爭亂好景偏宜白日遊年華每被青春換寄
語溪山如有情氤氲佳氣常鍾靈山中美酒置千斛待
我歸來尋舊盟

題竹

江南處處多修竹涼雨瀟瀟響寒玉孤根迸出龍欲馳
怒籜纔舒虎猶伏霽景時開忽往來清陰迥遶天垂綠
我昔金鑾夜直時月下風前時見之天然妙影落文窗
展轉江南勞夢思歸來食實時斫根斷渠流水分清妍
深叢嫩篠山雞語喚醒騎龍朝日邊故人示我新圖好
淇園渭水空煙草此君真節萬世同縱有冰雪自能保

扇中竹樹

常時十五二十過手弄素月雲間磨廣寒椎碎墮蛟室
龍影歛入扶桑波向道仙人一桂樹秋聲那得萬竿多
洞庭日本通銀河姮娥夜宴邀湘娥曙色雞鳴奈樂何
中秋不見月

吾聞廣寒八萬三千修月斧暗處生明缺處補不知七
寶何以修合成孤光洞徹乾坤萬萬古三秋正中夜當
午佳期不擬姮娥悞酒杯狼籍燭無輝天上人間隔風
雨玉女莫乘鸞仙人休伐樹天柱不可登虹橋在何處

帝閭悠悠叫無路吾欲斬蜥蛙磔冥兔坐今天宇絕纖
塵世上青霄粲如故黃金為節玉為輅縹緲鸞車爛無
數水晶簾外河漢橫冰壺影裏笙歌度雲旗盡下飛玄
武青鳥銜書報王母但期歲歲奉宸遊來看霓裳羽衣
舞

楊士奇

題費同知松樹障子

當代畫松誰最精王紱卓迪俱馳聲兩生以來鮮繼者

鳳池周璿新得名此圖筆有千鈞力全幅剡藤開潑墨
雙株奮起如雙蚪直氣森森勢千尺樛枝屈鐵蟠穹蒼
勁節磊砢鱗甲張長風颯颯動滿座六月清晝高堂涼
吉安別駕好奇古對此宛然巖壑趣茯苓琥珀焉足期
堅操終懷共遲暮別駕別駕臨安彥浙東山東宦游徧
四明徂徠千歲植所歷山林屢嘗見大材之成由化工
自古匠輪希得逢明堂清廟選梁柱何限空老深山中

楊榮

題馮敏山水圖

鳳池仙客天機精，筆端點染真天成。
想當適意自盤礴，呼吸造化含元英。
欣然寫此得佳趣，雲水微茫帶煙樹。
左拏右攫森相樛，恍若蛟龍飛不去。
懸崖峭壁不可攀，宕蕘直入霄漢間。
幽亭卜築在深處，塵氛不到清晝閒。
是誰蕭散事游賞，短櫂輕舟自來往。
晚風不動碧波平，潏灩寒光映蘭槳。
斯人偉矣真罕儔，飄飄儼若神仙流。
披圖一覽發清興，彷彿萬里江南秋。

題吳尚書山水圖

青山嵯峨半空立，萬疊芙蓉紫煙濕。
峯前昨夜春雨深，繞澗飛花水流急。
隔嶼人煙凡幾家，一徑蒼苔石磴斜。
溪迴路細長芳草，月落林幽歸暮鴉。
山深洞口行人少，白雲飛墜青山表。
恍見滄洲樹色微，如聞古寺鐘聲杳。
茅簷日出雞犬喧，十里煙光連遠村。
依稀乍入篋簾谷，彷彿自是桃花源。
乃知畫者通玄理，點染天機筆鋒裏。
尚書愛此欣得之，素壁高堂見山水。
人間美景不易尋。

此圖直比雙南金玉堂展卷慕清絕爽氣蕭蕭風滿林
胡儼

驟雨戲作

颶風吹迴雨如織黑雲壓空雷飛急青山隔江煙霧深
野水瀰漫新漲入老龍身疲鱗甲稀變形潛蟄枯樹枝
天書夜下霹靂追老龍走出樹輒披劈空掣雲捲江水
隴畝茫茫波浪起天公為民驅老龍老龍雖苦田家喜
龍兮龍兮爾勞慎勿辭歲豐民足爾乃無事遊天池

錦雞圖

卷四十

昔聞楚人不識鳳忽見山雞重購之我今畫圖寫生態
羽毛五色光陸離扶桑天雞啼一聲陽鳥散彩天下晴
此時山雞亦出谷喔喔飛來耀林麓千巖萬壑含東風
杏花吹香春雪紅顧影徘徊自愛惜揚翹聳翅紛蒙茸
竹上花間目正高向陽吐綬垂花條吳綾蜀錦織不得
戴勝偷眼驚伯勞切莫臨溪照碧流對鏡逢人舞便休
舞多目眩終顛仆世人空詫韋公賦

孔雀圖

有鳥有鳥名孔雀文彩光華動揮霍修頸昂昂翠羽翹
大尾斑斑金錯落由來麗質產南方丹山碧水多翱翔
芭蕉花開風正軟枕榔葉暗日初長忽聞都護啼一聲
山中百禽皆不鳴松篁引韻笙竽奏顧影徘徊舞翅輕
炎荒暑熱時多雨尾重低垂飛不舉一朝籠養近簾幃
可憐猶妬美人衣永嘉謝環善寫生畫圖貌得邊鸞清
老眼摩挲石苔紫渾似枇杷樹底行

王景

題江南秋晚圖

十年不踏錢塘路江上晴煙渺輕素并刀誰剪秋半簾
夕陽正在西陵樹對之便欲發浩歌西風蕭蕭水增波
胥濤已入亂山去木落臺空幽思多

王達

梁溪

微波皺綠迴輕風溪流直與南湖通人家兩岸幾興廢

鷗影蕭蕭夕照中
孤橈欲發臨溪口
澹煙寂歷明疎柳
水清月落正愁人
鐘鳴況是僧歸後
芙蓉隔溪千里多
白雲滿窗生薜蘿
櫓聲咿嘍剪寒月
去去其如離思何

王遜

為朱仲昂題薛澹園竹

我家昔住吳山麓
遶屋曾栽萬竿竹
如今見畫却題詩
憶在山中春雨時
暮雲作團飛不起
空翠滿衣秋欲洗
何當重掃石牀眠
一任露華涼似水

題梅花卷為顧御史賦

我家家在吳山住，路入梅花最深處。
天空歲晚雪紛飛，繞屋寒香千萬樹。
花時日日醉花邊，酒醒長吟花下眠。
聽到翠禽啼欲斷，任教明月照青天。
自從遊宦京華久，夢遶花前與花後。
故山花發想依然，何遜才華已非舊。
霜臺御史繡衣人，藏得橫斜水面真。
一幅齊紈裁皎雪，筆端渾是玉精神。
蕭齋凍雨簷花落，紙帳夜寒燈影薄。
恍然相對似還家，春信依稀生綠萼。
綠萼春生日漸多。

故山歸計尚蹉跎玉堂日賜宮壺酒其耐梅花似雪何
何當便赴看花約莫待江天吹曉角詩成却向畫中題
酒熟空思花下酌

題採菱圖

湖南風信起湖北浪花多欲唱採蓮曲翻成採菱歌採
菱歌斷汀洲暮何處却尋歸去路誰搖蘭艇笑相迎燈
火遙生白蘋渡

王儼

寄答黃伯亨

我馬從東來君車正西去有似風吹海上雲天際無心
忽相遇與君相遇即相知瀝膽輸肝無復疑虞卿豈顧
雙白壁平原輕擲二美姬狂歌一斗酒共醉六屏月拂
曙登古臺慷慨與君別君行五嶺南我阻三山道何處
我思君天涯但芳草昨朝鴻雁下江煙啣得君書置我
前開緘拂冰雪千里情灑然念昔與君多意氣相期豈
作桃李妍醴生立堂下叔向知其賢袁宏發朗詠謝公

遂回船丈夫一語苟有合何必結交窮歲年我有古干
將繡澁久棄捐寧甘困泥滓恥為兒女憐君有長歌向
余寫我將古調為君宣月明洞口鳴風泉清商一曲付
哀絃雲山麋鹿可為侶紛紛薄俗何其偏

宿桃溪方翁家贈別

清溪一帶緣桃花春來水上流胡麻東風尋源泛瑤棹
雲中遠見山人家於茲水木相含景裊裊松杉亂天影
少焉林壑衆籟鳴巾舄飛來片雲冷二三老翁住東陂

薜衣霜雪垂兩眉自言入山歲已久不知人世今何時
傳聞有客驚還喜共薦清泉飯松子煙林霧篠不逢人
碧草苔花應滿地問予何事在塵間那似山中日月閒
澗戶聊同魚鳥醉石牀常伴雲霞眠乍逢靈境真堪悅
區緣未謝還成別別後重來定幾時夢遶溪邊綠蘿月
東湖春意圖為樵門李姚生題

鴛鴦湖上春風軟柳絲無力桃痕淺暖煙籠碧水如雲
纖纖細草苔香滿滿樓臺畫大堤傍羅綺晴嬌綠水鄉

冰絃玉柱新調呂半蹙雙蛾倚淡粧鸚鵡雙雙點晴霧
百勞東飛燕西去紫泥誰染天上春雲絨留得相思句
日暮相思枉斷腸綠波千里共悠揚龜甲屏風花夢曉
一抹修蛾鏡中小

王恭

書香山九老圖

唐家名臣白居易暮年脫畧青雲器抗節羞趨當路門
拂衣起謝人間事以茲疎散愛香山洛下羣公亦遂閒

玉堂金馬俱殘夢流水孤雲同去還石樓煙樹朧朧見
八節迴灘瀉秋練雲衣落落古松姿鶴髮皤皤凍梨面
人生宦達應如此豈必浮名絳青史楚國三生少見機
竹林七子徒為爾名遂身閒古所稀洛陽山水又清暉
青山何處無佳賞白首湮沉空布衣

聞笛送人之塞上

橫笛對離亭扁舟越江口月下何人最斷腸天涯怨別
吹楊柳楊柳繁音愁復愁梧桐蕭瑟江楓秋長林半夜

葉皆脫積水三江雲不流長夜漫漫聽未了變羽回宮
猶嫋嫋越海天邊鳥不飛閩關月暗猿聲小須臾一曲
更淒清零落梅花滿楚城楚城迢迢接沙磧邊客聞之
淚俱滴黃埃積雪暗長關絕域窮荒草根白此夜愁心
獨對君明朝悵別又離羣單于城上吹羌管知爾相思
不忍聞

送張少府朝覲

閩州少尹家何處夢裏青山溧陽樹訟庭無事獨哦松

走馬金陵看花去青繩御路連青天五陵俠少黃金鞭
紅橋青幔多買醉少尹囊中無酒錢朝回道過鄉山口
春風又發秦淮柳溧水芹邊二校文相逢為問平安否

感懷

不彈貢禹冠不結蕭朱綬幾處移家任轉蓬半生失路
惟耽酒兔園挾策竟徒然欲逐長沮學種田秋風僅有
相如壁舊物空餘子敬羶異鄉淪落無朋友論交昨日
今何有誤將偃蹇對時人豈謂新知不忠厚萬事蕭然

一布衣白頭夢想故山薇
抱琴欲奏猗蘭曲目送雲天
斷雁飛

高棟

題臺江別意餞顧存信歸番禺

置酒臺江上悵然傷解攜
番禺天萬里矯首南雲低
停舟對君日將暮目送南雲指歸路
鄉夢多隨蜃母樓家林近入扶桑樹
滄浪浩蕩杳難期此別重逢又幾時
東去臺江應到海唯因流水寄相思

賦得吳航渡送趙少府之京

君不見吳航渡河上蕭蕭多古樹樹根積石長青苔應
比昔人繫舟處寂寞寒潮自往還關河北望空雲山天
浮百粵榮光歇海接三吳霸氣寒吳王城闕幾千載舸
艦何年到閩海危檣峻櫓逐飄風今日吳航名尚在江
上年年春草新城頭車馬往來頻野鳥不知驚候吏垂
楊空自送行人

王紱

過華叔端草堂寫晴竹於壁上

我愛君家遠城郭遶簷竹色侵簾幙
醉中揮翰寫晴梢湘雲一剪春陰薄
看來頓覺風氣清耳邊恍若聞秋聲
嘯歌到晚不歸去高卧翠陰呼月明

題青山白雲圖

我曾九龍山下住結廬正在雲深處
日日看山還看雲長教剪却當簷樹
無端一別猿鶴羣馬蹄南北徒紛紜
塵途底事拂衣晚回首愧負山中雲

題漁樂圖

遙天雨歇明殘霞涼風颯颯吹蒹葭晚來隨處可栖泊
五湖煙水皆吾家得魚且覓津橋酒旋採溪毛雜菱藕
除著沙鷗孰可親隔篷喚取鄰船叟生計年年一葉舟
全家不識別離愁婦能斫鱸兒行盞一笛橫吹萬里秋

題畫

結屋千山萬山裏軒窗四面峯巒起捲幔晴招嶺上雲
烹茶夜汲巖前水二三高人同素心杖藜時復來幽林

抱琴相延坐亭上一曲雅調山水音屋頭隙地肯相許
願作比鄰共相處賸採松花釀玉醪更覓黃精斲春雨
端午賜觀騎射擊毬侍醺

葵榴花開蒲艾香都城佳節逢端陽龍舟競渡不足尚
詔令禁籞開毬場毬場新開向東苑一望晴煙綠莎軟
萬馬騫騰鼓吹喧五雲繚繞旌旗展羽林年少青綸巾
秀眉豐臉如神人錦袍窄袖巧結束金鞍寶勒紅纓新
紛紜來往尤迅速馬上時看藏馬腹背挽雕弓金鏃鳴

一剪柔條碎新綠忽聞有詔命分棚毬先到手人誇能
馬蹄四合雲霧集驪珠落地蛟龍爭彩色毬門不盈尺
巧中由來如破的剗然一繫電光飛平地風雲轟霹靂
自矜得雋意氣粗萬夫誇羨聲喧呼擬金伐鼓助喜色
共言此樂人間無鑾輿臨幸天顏喜醺賜千官醉蒲醕
光祿尊開北斗傍簫韶樂奏南薰裏微臣何幸遭盛明
清光日近多恩榮呈詩敢擬長楊賦萬歲千秋頌太平

過梅花室

我曾泊棹西湖濱
千樹萬樹梅花春
孤山月照一篷雪
十里湖光如爛銀
興豪對客酣清醺
達旦賡吟騁雄健
燈前索紙呵手題
霜兔鏃鏘冰滿硯
年來浪迹隨西東
看花多在驅馳中
縱有香醪對明月
渾無好興酬春風
只今書劍來京國
欲訪梅花杳難得
亭館多栽逞艷姿
山林誰重淩寒色
春來未幾薄雪餘
蹇驢偶過西城隅
疎花寂歷三五樹
中有一室幽人居
室中幽人廣平後
旅寓看花為花瘦
窗橫古影神愈清
盃吸寒香骨應透

相逢休言一事無鄰家有酒須賸沽
趁取樓頭未吹角
莫教地上魚鱗鋪我因看花狂興發
花應笑我生華髮
曲逆長貧豈足論馮唐已老誰能拔
憐君與我同襟期
看花酌酒情相宜百年一任世所棄
寸心獨許花相知
我家君家隔江浙一水相通吳與越
此夕何妨對榻眠
夢魂還醉西湖月

錢仲益

牧牛圖

東臯二月春草生江邊放牛花雨晴牧兒唱歌牛齧草
穩坐牛背隨牛行牛角攢攢耳濕濕斷隴荒坡隨意入
煙蒲風柳不勝情日暮歸來荷蓑笠我本山林牧牛叟
濫著朝衫令白首儼買江南黑牡丹乞取閒身老農畝

青山白雲圖

連山盤盤隔溪水翠滴嵐光淨如洗松梢日出初雨晴
滿地白雲收不起溪窮路轉石徑斜隔溪遙見山人家
柴門深閉人不見暖風吹落朱藤花良工貌得無窮景

坐玩令人發深省何由築室住山間長卧雲窩弄秋影

題江南春雨圖

羣山鵲突雲模糊長蘿遠水連平蕪孤村絕浦望不極
幾家茅屋懸魚衆輕舟數點小於葉出沒煙浪同飛鳧
江空雨勢來不已水風颯颯吹菰蒲前山禪宮白雲際
明滅時見金浮屠貌將一段丘壑趣寫出萬里煙霞圖
憑軒寂聽無所見彷彿似有青猿呼我昔南遊會稽上
雲門六寺尋僧徒手支枯筇躡屐窮幽陟險隨樵夫

曉雲漫天失老鶴暮雲擁樹聞飢鳥石崖松瀑濺飛雪
水聲活活風胡胡若邪溪深不可渡沿流細路行縈紆
歸來濯足憇小軒冑中塵氣一點無自從江海困奔走
衝寒觸暑趨長塗追思勝賞不可到十年南望空嗟吁
朝朝覽鏡獨惆悵兩鬢雪白容顏枯東陽山人特好古
寶此名筆如瓊珠吳箋一幅不滿尺懷山卷海置座隅
鋪牀展軸看未了何異短褐藏天吳王郎妙手信莫及
功與小米論鉛銖想當運意揮染際倒瀉水墨翻金壺

祇今此景在何處欲往不得歲已徂還君此畫重太息
嗒焉長吟據槁梧

梁潛

題王晉卿春曉圖

憶昔扁舟經洞庭夜涼落月潮水平舟行數里不知遠
隔林隱隱聞雞聲推篷起視西山麓煙景微茫接溪曲
芳草依稀謝眺村綠樹深沉子真谷須臾旭景開瞳矐
千山萬山圖畫中誰家樓閣依晴翠朱門繡戶垂東風

樓外園林春已遍樓中美人夢初斷疎簾半捲落花深
年華却逐鶯聲換別來煙月幾經秋楚天西望空生愁
玉堂此日見圖畫彷彿湖山曾舊遊何時拂衣賦歸去
孤棹還尋舊遊路雨過芳洲春水深更擬褰裳採芳杜
袁忠徹

題張秋蟾畫龍

張公畫龍人不識筆法遠自僧繇得挂向高堂神鬼驚
恍忽電光飛霹靂想當渤海開筆力元氣霖霖浸無極

吐吞霧雨川澤昏
摩蕩雲雷太陰黑
江翻石轉窈莫測
雪濤卷空銅柱仄
洞庭扶桑非爾誰
顛倒滄溟為窟宅
乃知茲圖只數尺
坐令萬里起古色
何當置我君山湖
上之高峯聽此老
翁吹鐵笛

郭武

寄句曲山中隱者

康樂平生愛山水
移家直入煙霞裡
一窺塵網便深藏
兩以鶴書徵不起
頭戴皮冠手扶策
蒼蒼滿面風霜色

世人欲見恐難尋樵客相逢多不識賣藥修琴還到城
暫來倏去誰將迎伯陽已信皆糟粕李子何勞問姓名
予亦曾知君隱處風泉翠滴琅玕樹不待長鬚更致書
明朝載酒聽鶯去

晚渡白馬湖

輕風小寒吹浪花新柳茸茸啼乳鴉平湖一望幾千頃
遠水連天飛落霞斜陽忽墮澄波底白鳥猶明山色裡
巖更何處鼓鼙鼙櫂歌未斷漁燈起

沐昂

和逯先生聞砧韻

秋高萬木脫林塢與子庭前開綠醕忽聞別院動砧聲
西風吹斷蕭蕭雨隔岸人家紅樹稀辭巢燕子故飛飛
酒酣自起為君舞正愛涼飈吹我衣

曾榮

姚少師所藏八駿圖

周家八馬如飛電夙昔傳聞今始見銳耳雙分秋竹批

拳毛一片桃花旋肉駿疊聳高崔嵬權奇知此真龍媒
霜蹄試踏層冰裂駿毛欲掉長飈迴瑤池宴罷歸來早
絡月羈金照京鎬紫鞵飛時逐落花雕鞍解處眠芳草
由來駿骨健且馴弄影驕嘶不動塵有時渴飲天津水
五色照見波粼粼圉官騎來難久駐飲向春流最深處
珠銜寶勒不敢疏直恐飛騰化龍去古來善畫韋與韓
此畫豈同凡馬看人間造次不可得首霜秋深煙雨寒

題王孟端墨竹送人南歸

十年官舍長安陌欲種篴簫愁地窄軒前有此八九竿
蒼然一片瀟湘色九龍山人思不羣曾襟灑落如此君
筆端颯颯起風雨紙上漠漠生煙雲幾回看竹稱奇絕
為寫琅玕照冰雪縱橫屈鐵金錯刀滿堂便覺秋蕭騷
周郎愛竹癖於我興至時尋竹邊坐我生疎嬾無所為
但與江海同襟期喜君愛竹有如此便以此圖持贈之
丹楓白水江南路歸帆直向湖中度慎莫提攜過葛陂
恐化羣龍上天去

雲錦屏

陽烏曉浴滄溟水九野瞳矐曙光起照見匡廬雲錦屏
九疊晴開碧雲裏山中有客才且賢結廬正在雲屏邊
丹崖翠壁遞隱見紅霞碧霧相連延竭來遊宦牽纓冕
雲錦迢窈望中遠准擬相從南斗傍挂笏閒看未應晚

王直

題夏珪風雪江村圖

江天漫漫雲氣黑江風蕭蕭雪花白荒村古道人跡稀

惆悵津頭遠行客黃蘆低折沙草平遙望不見長安城
蹇驢凌兢縮如蝟鞭驅還欲西南征四山溟濛日應晚
辛苦羸僮未遑飯深林歸鳥棲已定茅屋人家去猶遠
吁嗟乎夏珪之筆凌范寬滿堂凜凜生晝寒卷簾看罷
重歎息歲晏高歌行路難

書所見

楊柳妖饒湖水滿芙蓉初發莖猶短小娃打槳並船歸
驚起鴛鴦相背飛

秋江獨釣圖

蒹葭淅瀝秋雨霜明月照水天蒼茫扁舟靜夜泝空闊
驚起沙邊鷗鷺行釣車不用置在傍此心寧羨鯉與魴
扣舷獨往歌滄浪歌聲激烈增慨慷山中之人遙相望
謝庭循自畫秋景

洞庭八月秋風早楊柳蒹葭漸應老柳下茅堂遠市廛
寂寞閒門對幽島居人無事不出門林深地僻如荒村
門前道上車馬絕過雨蒼茫空蘚痕江清水落沙石出

水底渾疑見鮫室鷺鷥鷺鷥鵝鵝皆有情唼喋喧呼亂晴日
我家故業連滄洲潁水文溪遶舍流圖中景物渾相似
見之令我增離憂君今善畫得供御下筆縱橫有神助
何時為埽寰瀛圖一葉凌波向南去

周忱

病驥圖

吳興父子俱能畫筆端往往追曹霸當時託意知為誰
惻愴令人傷此馬此馬虺頽未可輕昔陪八駿天衢行

綵雲禁籞春如海曾聽玉輅和鸞鳴一從謝病離天仗
骨聳毛焦氣凋喪恥與駑駘競粟芻自甘偃卧沙丘上
孫陽去後苦難逢寂寞誰加剪拂功羈金絡月復何日
顧影懷恩悲晚風古來千金市駿骨況此精神那可忽
飼秣重歸十二閑猶堪萬里奔騰出

蘄州送別易副使

江頭柳花白如雪江上行人正催別欲把長條贈遠行
蕩颺花飛不堪折今年花飛猶去年此時一去何時還

含情再誦江淹賦如在桃花潭水邊望君重來在旦晚
願君不道蘄州遠君看柳絮若無情猶自隨風去還轉

李昌祺

過吳門次薩天錫韻

七澤三江通甫里楊柳芙蓉照湖水閶門過去是盤門
半掩珠簾畫樓裡薜蘿生徧鴛鴦沙東風落盡棠梨花
館娃香徑走麋鹿清夜鬼燈明絳紗三高祠下東流續
真娘墓上風吹竹西施去後屨廊傾歲歲春深燒痕綠

題周參政所藏山水小景

天壤有異境描摹付良工佳山與秀水幻置軒窗中村
村陌陌皆勝處花竹園林饒雅趣過鳥疑飛却不飛行
人欲去何曾去松坡竹塢疊更重雪瀑倒濕青芙蓉岡
巒島洞盡在眼樵牧耕釣俱可容九曲溪流漾清泚荒
渡斜陽見舟尾石上吟翁鎮日留欄前眺客今年倚我
觀風物似杭州樹木雲霞分外幽豈必西湖有奇勝展
圖高興亦悠悠

魏驥

曉步

林居鎮日欣無事緩步堦苔淨於洗
日色晴涵瀚海紅
煙光淡抹秋山紫
家家籬落散雞豚
處處郊原足禾黍
從知熙皞由帝力
願把昇平紀青史

雪景

我昔承恩使西夏
周道倭遲過秦華
重岡複嶺冬正深
貂帽狐裘策官馬
黃沙白草風颼颼
萬玉飛舞長城頭

四圍山岳若銀鑄層冰洹盡黃河流黃河船膠不可渡
立馬津頭日驚暮天涯萬里魂欲飛手殭面圻將誰訴
張燈呼得關門開關吏熱火噓寒灰同行革囊有酤酒
我性不飲空持杯却懷有友西湖上茅堂此日成清賞
梅花窗外吐清香野菽山肴酌新釀醉來卧隱烏皮几
日斜妻兒呼不起固知仕止有不同故人之樂獨如此
我今乞歸自九重雪時亦對飛瑤空堆瓊積玉感天澤
謳歌擊壤祈年豐敲門忽云故人到不似王猷空返棹


手持山居對雪圖索我長歌寫圖妙細觀取法高房山
逼真眼底疇能攀我呵凍筆題其間蕪辭似覺難同看

劉鉉

桃花雙鵲圖

雙鵲何處聲查查天桃一樹紅蒸霞美人忽聽心自喜
捲簾遙對啟窗紗恐驚枝上鳥未折枝上花花任啄殘
應不惜早教歸信來天涯

御選明詩卷四十



總校官庶吉士臣侍朝

校對官檢討臣蕭九成

謄錄舉人臣傅瓌芳

欽定四庫全書薈要

集部

御選明詩卷四十一

欽定四庫全書薈要卷一萬八千五百四十一

集部

御選明詩卷四十一

七言古詩六



薛瑄

題墨牛

青松落陰石苔上雨餘百草芊綿長老叟牧牛牛性馴
牛背讀書興蕭爽書中之味深且長高晚盤古窺皇唐
日暮驅牛下山去風清月白天茫茫

綠楊芳草被平坡老人騎牛行且歌歌長扣角角欲碎
悠悠古意何其多布褐涼風生兩肘幾度歸來明月後
夜深遺響入清雲應有知音與攜手

鶴山小隱

大江之石多奇峯天台遠與羅浮通鶴山蒼蒼在何許
嘉名獨擅東南雄中有隱士好事者作圖遠寄烏臺下
烏臺柱史隱士交持卷索我揮狂毫開圖指點山佳處
峭壁迴巒簇煙樹澗花流出山中春松風埽遍溪頭路

數椽茅屋何蕭然白雲簷宇常周旋讀易已了嘉遯趣
作詩或賦招隱篇此境初從柱史說令人撫卷想奇絕
振衣千仞或可期萬里雲霄足超越

山水圖為趙給事賦

黃門給事好事者一幅江山誰為寫雲霧波濤滿眼生
坐覺襟懷自瀟灑衡廬寄疊岷峨高洞庭彭蠡洲渚交
又疑雪消蜀水來黃牛白馬增春濤細看清濁分天地
地脉山形宛相際良工妙奪造化工白浪青林走雲氣

緣江細路古木齊耳畔似聞幽鳥啼倚岸扁舟久將濟
入雲茅屋誰同棲江草山花不知數採芳未是良辰暮
英靈不聞澗谷歌仁智自諳山水趣憶我昔遊天下時
跋涉險阻探清奇何如此圖不出戶勝槩一覽無所遺

題羅侍御仙舟出峽圖

御史新圖妙難比畫船秋泛瞿塘水瞿塘水束三峽深
兩岸削鐵虛無裏虛無難辨峯頂高白雲林壑生虛濤
陽臺何處笑荒幻陣圖回首思雄豪雄豪一去幾千載

壯志何須增感慨自知廬角邪可觸不為猿聲淚空洒
東行更飽湖海觀繡衣不日朝金鑾覽君此畫動清興
扁舟便欲相追攀

過鹿門山

西來漢水浸山根舟人云此是鹿門峭壁蒼蒼石色古
曲逕杳杳藤蘿昏亂峯幽谷不知數底是龐公棲隱處
含情一笑江風清雙櫓急搖下灘去

苦雨

涼風颯颯雨聲急出門跣步苦沾濕山城拂地雲霧深
河渚交流潢潦溢田夫野婦坐歎息園中有棗不可食
况復離離禾黍垂及時不得收地力一年百事望秋成
秋成奈此淫雨積誰哉為我誅雲師宛見青天行白日

于謙

題畫

江村昨夜西風起木葉蕭蕭墮江水水邊蘋蓼正開花
妝點秋容畫圖裏小舟一葉弄滄浪釣得鱸魚酒正香

醉後狂歌驚宿鴈蘆花兩岸月蒼蒼

憫農

無雨農怨洛有雨農辛苦農夫出門荷犁鉏村婦看家
事縫補可憐小女年十餘赤腳蓬頭衣藍縷提筐朝出
暮始歸青菜挑來半沾土茅簷風急火難吹旋斫山柴
帶根煮夜歸夫婦聊充飢食罷相看泪如雨泪如雨將
奈何有口難論辛苦多嗟爾縣官當撫摩

池邊散步

臨流樹影半斜
晴波滉漾走金蛇
簷前燕子掠飛蝶
池面魚兒吹柳花
遊絲牽風白日靜
落花滿地青春賒
數聲啼鳥助幽興
門巷彷彿山人家

瞿佑

安樂坊倪氏女少日曾識之一別十年矣歲晚
與其母子邂逅吳山下則已委身為小吏妻因
邀至所居置酒叙話愴然感舊為賦此

吳山山下安樂里
陋巷窮居有西子
嫣然一笑坐生春

信是天人謫居此相逢昔在十年前雙鬟未合臉如蓮
學畫蛾眉揮彩筆偷傳鴈字卜金錢相逢今在十年後
鬢髮如雲眼波溜風吹繡帶露羅襪酒泛銀盃淹翠袖
自言文史舊曾知寫景題情事事宜但傳秦女吹簫譜
不詠湘靈鼓瑟辭暮雨朝雲容易度野鴨家雞競相妒
當時自詫苑中花今日翻成道傍樹日聞此語重悲傷
對景徘徊欲斷腸渭城楊柳歌三疊溫水琵琶泣數行
相送出門留後約暮天慘慘東風惡醉歸感舊賦新篇

重與佳人嗟命薄

偶桓

題息關墨竹圖

西清閣老李薊丘筆法妙過文湖州試拈雪繭翻墨瀟
淋漓埽作湘雲浮籜龍迸土翠胎綻秀出亭亭蒼玉幹
十莖五莖何必多老嫩風晴總堪玩堅貞苦節凌歲寒
裊娜新稍翔鳳鸞靈飈宛度珮環響壁月或照蛟龍蟠
薊丘薊丘難再得撫卷令人空喈喈品題況有松雪翁

從知價重千金直

李孝謙

題柴昆陵越山春曉圖

君莫著謝公登山屐更莫問子猷泛雪舟請君試看高
堂壁髣髴李白天姥夢中遊於越山川甲天下秦關蜀
道皆土苴柴侯晚年天機精酒酣潑墨為予寫天姥高
出東南天天台四明相蟬聯影落平湖一鑑淨正對賀
老山莊前近山青青遠山小煙霧溟濛漲春曉雲門日

出似聞鐘耶溪樹綠應啼鳥鳥啼不可聞林深不見雲
只疑空青四山合倏訝飛瀑雙崖奔極知妙手奪天造
真宰上訴天應笑獨脚山魃作鬼精偷向靈巖拾奇草
水竹江花何處灘漁郎翠簑露未乾青帘酒家石橋右
棹舟却憶姚江干長松之下一片石竹杖芒屨二三客
脫巾高挂白雲邊醉倚青天翠如滴

送徐允迪還城中

寒梅照虛牖嚴霜凋弊裘故人動歸興歲晏不可留徐

卿立身何坦蕩行年五十猶偃仰不思唾手取公卿却
甘低頭在草莽市中賣藥能逃名杖頭挑錢還解醒悲
來不作窮途哭時復有詩鳴不平忘年之交古來有臭
味相同即為偶來遲去疾奈爾何無限離情付杯酒北
風吹雨凝作花船頭敲冰船尾划道傍行人指歸路城
上棲鳥還到家城市塵埃易更改還念山林青眼在看
花有約明年來教我村童埽門待

劉績

送周明德應詔之京師

閭門柳條不堪折，只宜相見不相別。
人生蹤跡各東西，半是車輪與馬蹄。
把酒送君城北路，曉日鴉啼烏柏樹。
一聲歌罷，淚沾巾。僮僕催人上塘去。
願為轆轤纏青絲，轆轤可轉心不移。
男兒出處自有分，與君那得不相離。
官家有程行莫緩，後夜相思月還滿。

鄭嘉

題韓左軍馬圖

當時四十萬匹中出羣意氣偏豪雄三駿剪花蹄削玉
拳毛一團如旋風飛騰射獵南山下踏雪歸來汗猶赭
奚官乍卸紫馱羈解渴汲與華清泉鳳頭青絲掣欲斷
一口擬吸天池乾日奔千里如電走飲秣翻落駑駘後
東家蹇驢鈍莫驅熱浴冷水飢欲芻賢愚否泰亦如此
撫膺歎息良馬圖

謝矩

賦望郎回山

望郎回望郎不回心欲摧化作山頭一拳石質堅不朽
心不灰花開花落秋復春斃然獨立誰與鄰夜深惟見
皎皎月雨晴只有英英雲將心誓比雲與月雲有卷舒
月圓缺百年夫婦終古心豈辨新離與故別此心炯炯
天地知山高水深終相期郎君應有歸來時

張璪

社廟觀巫師降神

靈風吹壇毛髮豎老巫跳踉作神語千輪萬馬空中來

東海神君許行雨急醜椒酒祭神兵黑旗颭日陰雲興
鼓聲鼕鼕未徹鳴紙錢灰濕天瓢傾須臾雨歇神歸去
神鴉猶噪壇前樹

梅竹圖

鮫綃數尺捲煙霧誰剪瓊瑤貼輕素湘靈夜彈五十絃
博羅小鳳來翩翩翡翠旌旛矗空影珠玑生輝夜光炯
澄凝古月冰潭冷紫鳳叫斷眠龍醒

陳紹先

挾彈圖

連錢驄馬雕鞍新銀蹄蹀躞揚風塵一聲嘶過莎隄畔
雨香雲暖當芳春烏紗雲錦新承賜侍宴明光醉歸去
彎弓挾彈望飛禽落花滿地無尋處

奚官平明出建章金羈白馬多恩光翻身忽見草中兔
雕弓滿彀如鷹揚四蹄蹴踏煙莎短垂鞭緩把絲韁綰
歸來猶帶上林酣揮袂香風春日暖

岑琬

聞鶯懷戚學正在滄洲

我有故人在滄洲思之不見心悠悠木蘭為楫沙棠舟
南來鼓櫂乘中流嚶嚶好鳥如相求載飛載止鳴不休
願以盟言結綢繆為予一洗離居愁何以報之青琳球

張宥

朱澤民寒林平遠圖為徐用理作

凍雲壓空雪欲作野曠陰凝氣蕭索朔風一夜捲長林
萬木離披盡搖落天連平遠眼界寬前山宛在空濛間

溪頭流水急如瀉日夕噴瀑聲潺湲我嘗經行出林際
望斷孤邨日將暮野鳥啼飢那忍聞瘦馬經寒縮行步
悄無人跡途路賒此時寧不思還家人生慎勿事行邁
披圖尚爾添咨嗟

沈如美所畫美人圖為徐文輝作

流蘇綴綵鴛帳寒金鴨不飛香縷殘新霜撲簾白如粉
啞啞烏啼金井闌芙蓉屏開睡初醒守宮淺褪臙脂冷
玉釵慵整雙鳳凰春愁壓翠蛾眉長

杜瓊

贈劉草牕三十韻

河圖一畫人文現書畫已在義皇時鳥跡科斗又繼作
象形取義日以孳肖形求賢在商世書畫從茲分兩岐
秦漢畫工可指數筆蹟已遠不可追顧陸張吳後先出
六法盡得誇神奇山水金碧到二李水墨高古歸王維
荆關一律名孔著忠恕北面稱吾師後苑副使說董子
用墨濃古皴麻皮巨然秀潤得正傳王詵寶繪能珍奇

乃至李唐尤拔萃次平彷彿無崇庠海岳老仙頗奇怪
父子臻妙名同垂馬夏鐵硬自成體不與此派相和比
水精宮中趙承旨有元獨步由天姿雪川錢翁貴纖悉
任意得趣黃大癡淨明菴主過清簡梅花道人殊不羈
大梁陳琳得書法橫寫豎寫皆其宜黃鶴丹林兩不下
家家屏障光陸離諸公盡衍輞川脉餘子紛紛奚足推
予生最晚最愛畫不得指引如調飢幸逢聖世才輩出
且得遍扣容追隨友石先生具仙骨落筆自然超等夷

葵丘爛漫文鼎潤獨醉獨數寒林枝綿州寓意最深遠
數月一頓非為遲我師衆長復師古揮灑未敢相驅馳
溷縑浣楮且不厭寫就一任傍人嗤劉君識高頗見錄
往往披對心神怡且云慘澹有古意口不即語心求之
我有鷺瓢富題詠欲得長句須君為十年不與豈有待
以彼易此何嫌疑我詩我畫既易得請君不吝勞心思

採菱圖

苔溪秋高水初落菱花已老菱生角紅裙綠髻誰家人

小艇如梭不停泊三三兩兩共採菱纖纖十指寒如水
不怕指寒并刺損只恐歸家無斗升湖州人家風俗美
男解耕田女絲枲採菱即是採桑人又與家中助生理
落日青山歛暮煙湖波十里鏡中天清歌一曲循歸路
不似耶溪唱採蓮

秦旭

苦雨簡立夫

鵜鴒雙雙啼屋角細雨斑斑晴復作碧水蒼苔野外昏

挑燈坐聽簷花落輕寒惻惻透重扉
番把羅衣換袂衣
出門可奈春泥滑孤負西山筍蕨肥

羅紘

題燕文貴秋山蕭寺圖

長江浩蕩秋波碧待渡行人立沙側
望中煙樹翠模糊
夾岸層巒幾千尺禪宮梵剎山遠
林林間曲徑歸僧尋
也知畫史真善幻一幅生綃傳至今

高得暘

錢舜舉寒林七賢圖

騷壇逸響何寥寥作者逝矣誰能招
詵然七子美風度乃有遺像圖生綃
衣冠半帶晉秀氣人物絕是唐中朝
想當朝事得休暇擬采野景歸風謠
青驪黃犢踏凍雨褰驢瘦馬衝寒飈
醉鞭笑停以按轡吟鐙戲拍摧聯鑣
看花多情且少待尋梅有興非無聊
此圖我嘗見十數高林大樹風蕭蕭
埽除閑冗存簡素吳興筆老才尤超
方之粉墨巧塗染奚止天地相懸遼
尚疑高李六君子

當時未見潘逍遙道同氣合志相感雖曠百世如同僚
畫師晚出有深意況自昔日傳今朝屋梁落月見顏色
妙處不待窮摹描君不見袁安僵卧寒正驕王維乃作
雪裏之芭蕉

蕭鎡

題九鷺圖

宣德年間邊景昭彩色翎毛稱獨步近時林良用水墨
落筆往往皆天趣鴛鴦鳬雁清溪流寒鴉古木長林幽

等閒得意即揮灑一掃萬里江南秋此圖九鷺真奇絕
散立清煙乍明滅日長坐久看轉親飄然點點青天雪
翱翔霄漢殊不驚欲下未下渾有情潛蹤獨趁水邊食
延頸忽向蘆中鳴吁嗟林生精藝有如此座客見之誰
不喜洞庭湘渚在眼前暝色慘澹涼飈起方今聖主覃
恩波四海山澤無虞羅悠悠羣鷺各自適雖有鷹鷂奈
爾何

徐有貞

江叟吹笛圖

八月蒼江蘆覆州南洲老人迴釣舟壺漿飲空獨醉後
橫笛吹開天地秋弄節調音轉淒激蕭蕭兩鬢寒衝額
山雲漠漠山樹青江水粼粼江月白是時萬籟俱無聲
寥寥玉宇聲縱橫颼風淅瀝隨處發玄鶴咬夏相和鳴
鳬雁飛來如近覩鵲鵲徘徊鷺鷥舞靈妃不入水仙宮
神龍盡出馮夷府一龍吟浪羣龍鬪鼓鬣揚髯擁先後
傳宮換羽自浮沉過徵歸商送清溜一聲叫破蒼旻裏

鴻濛呼回九澗底
暘谷金烏忽驚起
搖落煙波千萬里
倪謙

童戲圖

曲闌護春小園內
芳草芊綿織新翠
屏山牡丹開暖風
吹墮輕紅粉香碎
誰家兒女蜀錦檔
柔髮初剃靛色光
兩兩三三戲晴晝
懽呼競出花臺傍
鞦韆木架雙旗插
綵繩低垂畫板滑
向前推送身轉高
架上連環韻鳴軋
脚尖背蹴香塵飛
珠汗微沾金縷衣
丹青假面恣塗抹

舞腰更把爛斑圍嬌娥並坐遺針線手弄折枝情戀戀
花腔小鼓閒不敲竹馬金鐃拋地遍玉貌撲蝶意自癡
紫蘭綠葉紛離披君不見聖主仁恩致蕃育四海民物
陶春熙

雪景為毘陵陳公懋賦

江天雨雪路盡迷層峯壁立瓊瑤梯蒼松凍合玉鬚老
翠篠寒壓銀梢低屋低幽人常閉戶最愛銀華絕纖汙
翠窗半啓捲書幃手把青編映輕素邨南有客隱者倫

一肩壺榼來叩門遙知相對飲五斗紅光滿面春風溫
人間此景良不惡林泉似傍蘭陵郭會須乘興訪元龍
共倚江樓招白鶴

商輅

應制西洋駒

天生駿骨真奇哉貢之遠自西洋來西洋神駒何所致
雲霧晦冥初降胎身簇丹砂蹄削玉月鏡夾瞳耳批竹
追風掣電氣如虹世人得此那敢畜當時皇祖御宸極

德化覆冒西南國海不揚波風不鳴重譯來朝靡虛日
豈無象犀與珠貝不貴異物貴良驥玉階控獻聖情怡
振鬣驕嘶如有意天閑自此識龍種駕駘一見覺神悚
孳生歲歲蕃且息廐櫪充牣如雲湧郊壇有事脩威儀
錦韉寶絡光陸離和鸞前導恣容與凡馬不許爭驅馳

山水圖四首

浮雲積翠山稜層煙波浩渺滄江橫就中風景如武陵
又疑方壺與蓬瀛高人妙得丹青趣展素揮毫若神助

巖崖峭絕瀉飛流嵐岫溟濛鎖雲霧楓榆夾岸羊腸遶
漁舟蕩漾忘昏曉人間何處有此境願一登臨散懷抱
蒼崖萬仞高插天銀河直與南溟連畫工繹思寫縑素
天涯地角來筆端晴巒曉嶂空翠濕水色湖光渺無極
依稀遠樹含紫烟隱隱平林帶秋色夢中忽向君山遊
君山一髮青如蚪覺來披圖賦新句瀟湘雲夢清氣浮
天下幾人畫山水王維之畫世無比生綃一幅垂中堂
咫尺應須論萬里十日五日一山水雲水飛動山盤鬱

孤峰絕壑結茅茨漁舟出沒秋江夕問君何從得此圖
愛之不啻如拱壁還君圖兮贈君作白雲回首暮山碧
誰寫江山妙莫比遠岫危峯向天起想當濡墨揮灑時
無限風光歸筆底若濃若淡山嶙峋欲斷不斷雲縱橫
萬壑千巖勢幽絕羅浮姑射徒為名青林遠近不知數
林下山房啓晴戶令君鵠立雲霄端疑是當年讀書處

龍

神龍神龍天下奇爪牙鱗甲光陸離潛藏顯見各有時

頃刻變化誰能知有時鼓鬣青冥端風雲慘黯白晝寒
有時揚鬣入海底奔濤翻浪摧羣山馮夷海若愁欲逸
龜鼉膽落蛟螭泣固知靈異乃如此豈比尋常池中物
畫師巧奪造化工揮毫染素有神通須臾又出真頭角
便覺煙霧飛空濛耳底轟轟聞震霆簷外颯颯疑雨聲
古來張繇擅奇絕衆史紛紛奚足評嗟公好古尤好畫
得之不復論高價相看自足豁心目萬里滄溟在堂下
邇來盛夏旱為雲安得致之昇碧落捲水作霖被八荒

收却神功入寥廓

虎

壯哉於菟豪且雄
猛氣不與凡獸同
吞牛伏豹爪牙利
空谷一嘯來天風
黑為文兮白為質
光彩斑斑炫晴日
妥尾橫行不畏人
百獸滿山皆股慄
渡河負子一何仁
銜符化石亦以神
藜藿因之不敢採
固知鷙悍無與倫
天生英物真奇特
庸史如林貌不得
此圖分明意態新
絕似南山真白額
心閑氣定神揚揚
眼如夾鏡雙瞳光

向非筆端巧如此此物安得來高堂卒然一見驚心目
勢若負嵎誰敢觸聽之不聞聲咆哮但覺端端徒踣躅
吁嗟此獸名山君狐兔屏跡難為羣五雲深處陪蒼鱗
餘威自足清妖氛

卞榮

嘉興留別諸友

春波門外上春船春漲葡萄綠浸天共君細細酌蓬底
西望落日橫孤煙倚蓬橫玉徹三弄飛花誰遣回風送

須臾月出光滿座盃光濫濫金波動美人相逢良不多
美景豈可成蹉跎為歡未久又為別空勞春夢落春波
贈許德容

少年赤手能縛虎踏遍東華軟紅土纏頭百萬輕買笑
挽弓兩石漫好武江南風月誰平分拂衣歸卧龍山雲
姑蘇臺下為別墅招要三友詠五君金屏如花人去早
北里薰天跡如埽平章不必喚張侯來往風流成二老
錦雲軒為何揮使賦

朝入錦雲軒暮作錦雲夢夢中滿袖撲紅香豔妝醉壓
闌干重酒杯如海和雲吸簫鼓聲喧令行急覺來但見
膽瓶梅冷風吹簾雪花濕

林良雙鴈圖為王學士廷貴兄廷彥賦

林君善畫天下無海注墨汁傾金壺金門承詔屢揮灑
餘子碌碌非吾徒既不畫丹鳳棲碧梧又不畫文鴛依
綠蒲特作槐堂雙鴈圖涼風颯颯吹黃蘆一鴈俯啄秋
江菰一鴈翹首如相呼乘軒恥隨衛懿鶴化鳥懶逐王

喬臯吾知林君有深意此圖將以比兄弟槐堂兄弟今
二難同德同心本同氣芳名豈但動一時勝事終當傳
百世丹青我已重林君手足誰能似王氏宣王有道美
鴻鴈周公多才賦棠棣顧予淺薄敢題詩三月紫荆花
底醉

陳憲章

題馬默齋壁

屋後青山屏翳合檐前綠樹煙花匝主人閉門履不納

跣趺明月光繞榻客來問我笑不答但聞山鶯啼恰恰
橙橘盈園野芳雜門外一江深映閣四時八風誰管押
樹飛霧走龍騰甲拙者孤舟持酒榼成化十年甲午臘
贈陳冕

南有滄溟水北有崑崙山我屋正在溪山間瞻望不遠
行實難白雲朝暮常漫漫桃花欲開梅又殘問君此去
何時還

過端溪硯坑

峽雲鎖斷端溪水白鶴羣飛峽山紫獨憐深山老鴈鵲
萬古西風吹不起安得猛士提千鈞亂石溪邊夜槌碎
與黃叔仁乃父題東溪卷

昔余大父渭川府君居此溪上與黃氏故鄰也去
之六十餘年矣閱此卷有感而作

春煙漠漠溪溶溶鳥鳴終朝低竹叢桃花亂落溪水紅
白首一人扶一筇醉中忘却溪西東誰載咿啞進酒篷
朝歌夕舞煩兒童吾廬若在茲溪上如此風光不讓公

對菊

淵明無錢不沽酒九日菊花空在手我今酒熟花正開
可惜重陽不再來今日花開顏色好昨日花開色枯槁
去年對酒人面紅今年對酒鬢成翁人生百年會有終
好客莫放樽壘空貧賤或可驕王公何乃束縛塵埃中
簪裾何者同牢籠

聽李深之說綠護屏聖池歌

天風吹斷雲冥冥陰崖露滴池水清牧童投竿蛟龍怒

空山白日雷霆驚好事何人解尋覓
李生為我言歷歷
安得健步上崢嶸
萬里直見滄波橫
更憑猛手碎嵯峨
一徑密遶青松多
池旁是我安樂窩
近者青松遠滄波
紅塵溷溷如吾何

周鼎

勸農

二月二日天作雨
縣官府官齊出城
白頭父老花間迎
亦有牧兒先馬行
牛亦不避馬不驚
饁者自饁耕者耕

東邨西邨鼓笛聲願得守令枉柴荆田家年來解留客
新婦炊粳姑磨麥

郭登

自公安至雲南辰沅道中謁山王祠

山王廟在山深處鴉烏亂啼烏柏樹神威猙獰怖殺人
朱吻長牙眉倒豎紅綃抹頭袍袖結手接黃蛇啗其舌
短碑不題神姓名蕪詞漫書唐歲月陰風颯颯吹靈旗
夜聞甲馬空中嘶老巫開門馬無跡但見狐鳴鬼嘯鵲

鷓鴣啼山前居民種禾黍歲歲求晴復求雨神靈不靈誰
得知老巫分明作神語往來行人多再拜爐中無香畏
神怪唱歌打鼓燒紙錢蒼鵠白羊朝暮賽還把殘餘拋
野草神意歡欣烏亦飽老巫叮嚀客無慮萬水千山放
心去

柯潛

山水圖為兵部郎中王恕題

玉堂清暑春風前焚香看畫皆神仙畫中風物得真意

峯巒隱約披雲烟大山如龍欲飛去小山盤盤如虎踞
奔流一道破山來散作濤聲滿江樹遠邨微茫三兩家
古渡無人橫斷槎近邨茅屋蔭榆柳門前沃土饒桑麻
別有高亭向洲渚斜日滿簾水禽語滄波浩浩欲吞天
蜃氣昏昏欲成雨初疑匡廬山下落星灣又似洞庭湖
上之君山瓊宮貝闕倚霄漢無乃蓬萊方丈非人間我
生慣識山中樂隨意雲樓與山閣故鄉一別今十年石
洞梅花幾開落臨圖忽憶舊遊蹤便欲沿溪上丘壑此

身留滯未應歸回首江天雲漠漠

仙溪龍華寺

寶幢山下煙霞古老樹如龍欲飛舞花氣薰成五色雲
泉聲散作千林雨我愛溪山事事幽錦袍醉踏東風遊
題詩淨埽巖頭石把酒還登竹外樓空門自與人間別
夜榻焚香卧清絕明朝長嘯拂衣歸閒却溪風與山月

童軒

捕魚圖

東風昨夜吹湖曲一川新水參差活漁郎舉網唱新詞
掉破鄰鄰鏡光綠妻孥汲爨具朝飧江籬紫笋豚魚新
鄰舟自小共鄉陌來往相看那更嗔輕鴻點點穿雲杪
綠楊細雨寒生早數聲柔櫓下中流煙水茫茫遠山小

山水圖為沙士清題

青山一片知何處雲際依稀辨汀樹春來泉壑盡爭妍
翠雨溟濛飛薜荔山下茅茨凡幾家小橋流水竹林斜
陰陰蘿逕留啼鳥寂寂柴門掩落花故人家住錢塘曲

彷彿當年舊書屋望海樓頭夕照明富春郭外平燕綠
西湖高柳拂晴煙載酒時乘賀監船驚嶺朝涵霞氣潤
鷗波夜逗月華圓竭來旅食秦淮邸回首湖山渺何許
詩興常尋仙姥雲夢魂幾聽胥江雨南宮先生筆有神
畫圖重見李將軍晴窗暇日一披玩萬壑千崖盡在門

題山水圖次宋尚寶韻

蘼蕪吐碧連洲渚無數眠鷗不飛起青山重疊畫屏開
知是朝來洗輕雨新縛茆齋傍水鄉濯纓幾度和滄浪

相過况有知音在絕勝成都舊草堂

王越

題蠲上人畫

好山萬仞高插空羣峯並列青芙蓉大者突兀如盤龍
小者箕踞如蹲熊峯頭短樹亂如草凌霄獨立蒼蒼松
一重流水一重竹竹邊盡是山僧屋上方下界知幾重
銀杏紅椒滿空谷山中屋貯山中雲山中雲卧山中人
山中之人出山去畫裏看山秋復春

走筆送謝大叅

捲地風寒聲冽冽夜深吹落關山雪夫君何事遠相過
一片冰花凍髯結便呼斗酒澆離腸談笑氣吞湖海熱
三十年來契闊情無端又作匆匆別屈指長安多故人
見君應問天涯客為言兩鬢已婆娑獨有此心猶似鐵
吁嗟我老不足憐塞上征夫淚成血

張寧

仕女圖

吳城士女越樣妝籠冠盤髻銷金裳東風淡蕩桃李月
看花不語情何長女伴相將牽穉子庭院無人花正芳
陽春宛宛白日暮空抱花枝歸洞房

劉溥

題畫

荻花吹雪江風冷江上微雲淡山影誰將水墨染生綃
一片江南晚秋景人家住近紅葉村紅葉照水如春源
問津有客遠相訪童子候迎先埽門隔岸分明皆橘樹

看來應是橫塘路水禽格格踏波飛沙雁悠悠入雲去
我別江南今十年客窗見畫心茫然明年準擬買歸櫂
漫遊重賦江南篇

題崑山沈愚通理詩集

吳城東頭八十里玉山青插婁江水何人秀發山水間
沈生文章妙無比清如玉樹含秋霜麗如五色雲錦張
琅然天外度靈響一曲一奏春風香春風吹入長安陌
紫陌煙花爛晴色隋珠趙璧常自珍樂府詞林盡相惜

生今年才二十餘聲名欲與前輩俱方今四海被皇化
好協雅頌歌唐虞

題畫龍

古來畫龍稱葉公後來又說陳所翁嗚呼二人不可見
神妙誰復追其蹤此圖知是何人作一見令人即驚愕
勢翻滄海起風雷身湧長空奮頭角雙睛潑電鱗鬣分
左盤右蹴挐飛雲軒然天地動光彩此時不顧魚鰕羣
滿堂慘澹凝煙霧相對咨嗟毛髮豎田疇歲旱望甘霖

破壁須看上天去

題畫虎

千山萬山日向晡啞啞老樹愁啼鳥長塗迢遞人絕跡
奮躍只有黃於菟長風颼颼震林木百獸紛披望風伏
霜牙凜凜摧萬夫金鏡瞳瞳射雙目飢來擇肉惟熊羆
不更小取豺與狸田家黃犢要耕種又肯搏攫誇能為
如今天關求守備蓋世雄威素稱異舉首為城掉尾旌
願保皇家千萬世

江鄉漁樂圖

桃花雨歇春潮漲江中鯉魚隨水上香蒲葉短白鷺飛
漁父乘船自來往船頭巨罾三尺餘轆轤引綆如引車
浪花觸船魚亂躍兒女相顧爭歡呼江頭賣魚朝買穀
晚來還向江頭宿老翁不愁兒不啼新婦船中炊欲熟
金文鼎秋林醉歸圖為沙溪陳原錫賦

霜華灑紅樹頭葉白雲掩映山重疊黃犍馱醉出西莊
童僕扶持穩如楫此時陶然那復知世塗奚較險與夷

眼中萬物一何有，只有松風吹接羅。
疎林斜光漏殘照，酡顏霞影爭輝耀。
深山閒靜不逢人，豈有襄陽小兒笑。
柴門向晚猶未闌，山妻煮茶方候還。
人能出飲醉即返，千里龍媒應是閒。

繭菴為長洲沈孟淵賦

兜羅膩疊香雪溫，影逼混沌春無痕。
龍精出火玉抽縷，刻楮黏番羞薄昏。
纖華茸茸白雲老，雙輪斂輟晴留曉。
劈開元氣納崑崙，身外乾坤一漚小。
水晶簾幕相間垂。

鮫綃掩映光參差落花成團捲蝴蝶蹴破東風閒不知
東風吹塵塵默默紫麟駝醉華胥國海桑含綠又千年
走馬西陵報消息

送盛侑赴吳江醫學

闕下新涼生潞河江南猶唱採菱歌菱歌嫋嫋唱不斷
畫舫載風衝白波香蘭葉勁那堪結美人不是輕離別
一階領得故鄉官堂上雙親正垂雪玉壺滿注香露清
欲別未別難為情梧桐楊柳秋未老積水半涸天河橫

吳江一望五千里鴻雁亦逐孤雲征長橋鯉魚黃金色
太湖影動羅衫碧好將尺素待東風杏花春雨傳消息
白雲軒

山中多白雲天上多清風清風解炎熱白雲自西東江
頭坐看雲起處一片從龍上天去化為甘雨潤枯苗不
作繁陰宿高樹清風冷冷吹我衣還送白雲天上飛天
香不斷瑶草碧何處玉笙騎鶴歸

賦得瓊花觀送人

瓊花觀在江都雲窗月館仙人居無雙亭前一方地昔
日瓊花今已無玉女香車游碧落回首人間塵漠漠重
闌空護八仙花飛珮誰乘九臯鶴古城楊柳接東橋十
里紅樓路不遙行舟過此一停泊碧樹陰中聽紫簫

湯肩勳

聽秋軒

老桂無香露華溼涼月半庭草蟲泣白茄灰冷黑狻猊
坐擁孤衾百憂集西鄰小娃夜春黍落葉喧階隔人語

何處一聲金剪刀，萬玉琅琅敲急雨。
笑擲殘書起推戶，簷胃簾旌遲鶴步。
明河濫濫斗杓橫，興來錯誦歐陽賦。
竹泉翁席上贈歌者楊氏

秋風茉莉吹香雨，簾外燕嬌肆輕嫵。
醉眼朦朧酒盞空，睡著司空相公府。
席前一點櫻桃破，雲揭楚天飛鳥墮。
鴛鴦小袖撝紅綃，二十五絃重抹過。
三寸麻霞黃鵠背，錦地氍毹蹴春水。
回身偷眼顧周郎，舞困落花扶不起。
雙檠隕淚爐薰熄，對景無言恨如織。
翠靨光浮琥珀痕，

鮫綃冷沁珍珠迹兩剪晴波拂曉山白衣孤客感鄉關
何幸梨園舊宮使偷傳樂譜向人間

水月舫為奚川錢竹深賦

太一真人蓮一瓣飄飄萬里來天漢移入江南錦繡窠
蘭橈桂槳空凌亂長鯨對舞碧紗窗缺兔潛窺紫絲幔
黍瓮浮香春可斟蒲帆颺彩風堪喚老興閒攄曲數謳
幽情緩發琴三歎古蹟多因潮洗平遠山忽被雲遮斷
曩時螃蟹落錢昆今日鱸魚到張翰莫令惠子識逍遙

且拉盧生遊汗漫冰壺影裏塞鴻飛海鏡光中沙鳥散
好天良夜屬君多大壑深溪留我伴乾坤正乏濟川材
忍教獨繫黃蘆岸

竹深處為奚川錢理平作

瑤空露滴秋光冷水壺倒浸琅玕影玉簫聲裏鳳凰飛
一色綠雲三萬頃主人高思油然發六尺桃笙湖水滑
左琴右史恣徜徉大俎深盃從曠達幽元占斷乾坤奧
明月清風滿懷抱嗟吾老癖近來增可許肩輿時直造

義婦行 有引

吳越王有大功於東南而子孫食其報者復異乎
人世傳忠孝雖婦女亦可嘉焉顧處士女妙真繼
其十七世孫時用室遭張氏亂棄其所生而全前
妻之子其孫理容理平出事跡觀焉為古體一章
以厲世云

顧家一女膚如玉炯炯靈臺抱貞淑擇配奚川武肅孫
并白親操謝膏沐不必荆釵并布襖雍雍自是閨中寶

撫卑事上盡歡心內外皆稱新婦好歡樂未央災禍來
閭閻滿眼飛塵埃長鯨大豕互吞食雌凰雄鳳難徘徊
強將性命依巖壑栢葉松肪共咀嚼草衣木屨度晨昏
乃畏強梁橫侵掠丈夫前室有佳兒哇哇相逐遠奔馳
足趺腹枵行不得鋒橫矢亂計寧施妾身有子年尤小
恩義欲兼嗟力少殘生苟幸得完全孤誠自有神明表
拊膺長慟望天呼回頭已作溝中枯男子雖羞鄧伯道
婦女何慙魯義姑皇明九五真龍出一掃寰區羣蚤蝨

歸來室宇尚依然四方重覩昇平日
屹然婦織與夫耕眼看家道日康寧
蒼蒼主者豈無謂兩男一女連緜生
五十年來三百指蝨斯奪盡前人美
珍珠簾捲畫堂深鶴髮披肩全壽祉
節孝賢能世豈無蒼黃誰得展良圖
傷哉此道日凋喪事跡何由付董狐

蔣主孝

酈生長揖圖

拔劍斬蛟神媪哭蓋世英雄逐秦鹿
君本高陽一酒徒

乃敢庭前嗔濯足五年帝業本天命待君濯足何為辱
溺冠不罵老書生猶有攻齊半分策君不見子陽聲折
竟如何回首江山空碌碌

王淮

錢舜舉畫花石子母雞圖

落紅香散東風軟靈巖絡翠苔紋淺閑庭晝永日當空
花影團團移未轉兩雞不識春意佳棲遲也傍庭前花
父雞昂然氣雄壯獨立峯顛發高唱母雞喈喈領七雛

且行且逐鳴相呼兩雛依依挾母腋母力已勞兒自得
兩雛啾啾趨母前有如嬌兒聽母言兩雛唧唧隨母後
呼之不前不停口一雛引首接母蟲兒腹已飽母腹空
嗟爾愛雛乃如此不知爾雛何報爾錢翁摹此悅生意
我獨觀之暗流涕劬勞難報慈母恩漂泊江湖復何濟
展圖三歎重摩挲雞乎雞乎奈爾何

王貞慶

春日偕蘇一平蔣五忠沈一愚遊劉公祠

都城二月春熙熙尋芳每共幽人期長干白下總名勝
載酒攜琴隨所之今晨乘興出西郭花底停驂遊古祠
祠宮岩窈白雲裏丹青臺殿張翠幙落梅紛紛墮香雪
垂楊冉冉搖金絲憑高縱目倚闌檻乾坤清氣凝詩脾
從遊賓客盡文彥豪吟謔浪忘吾誰東海蘇公最英俊
掀髯一笑擒雄詞天孫機杼織雲錦五色絢爛含朝曦
淮南蔣生尤敏捷吐語字字皆新奇長鯨怒吸海波竭
崢嶸露出珊瑚枝玉山沈郎更瀟灑芙蓉秋水涵清姿

摩挲石壁寫新句毫端墨汁光淋漓呼兒洗盞罄餘興
醉來不覺烏巾敬飛光百歲猶瞬息人生行樂須及時
樹林陰翳鳥聲雜斜暉又駐西山陞馬蹄歸去踏芳草
風流不減高陽池

送沈崆峒歸玉峯

客從東吳來暫向京華住看遍京華春更憶東吳去秦
淮橋頭煙柳青執手臨岐別恨生扁舟後夜知何處月
色江聲無限情

鄒亮

水仙花效李長吉

馮夷鏤冰駐花魄，奇芬染肌沁仙骨。
天風吹夢落瑤臺，家住江南水雲窟。
弄珠拾草瀟湘渚，帶月迷煙愁不語。
小龍潛開水晶殿，玉杯涼露承華宴。
青鳥銜書來閨苑，笑指蓬萊水清淺。

又效溫飛卿

宓妃肌膚瑩冰雪，體素含香質清絕。
驪宮夜寒愁不眠，

微步滄洲拾明月月光如練波茫茫仙魄不歸愁斷腸
湘娥含顰老龍泣鮫人灑泪銅盤濕瑟瑟江風吹夢醒
翠袖籠寒韞羅冷白露無聲滿瑤草煙水迢迢鏡光曉
梧桐仕女圖為錢孟實題

蘭膏膩滑金釵溜繡帶斜分嬋香袖鎖窗睡起思嬌慵
練裙六幅湘波皺月轉虛欄風滿林碧雲迢迢銀河深
香塵不到韞羅冷下階踏碎梧桐陰梧桐老去孫枝長
枝上鳳凰棲兩兩憑誰巧斲琴瑟成諧奏宮商協幽響

蕭郎不歸春意闌夢繞梨雲花作團銀塘露冷芙蓉老
錦鴛怨入秋風寒楚雲湘水鱗鴻杳兩點春山愁不埽
低徊顧影悄無言明朝只恐朱顏老

徐庸

題劉阮天台圖

白雲蒼靄迷行路水複山重不知處行過磻谷有人家
忽見東風萬桃樹芳香豔態娛青春花間得遇娉婷人
五銖衣薄捲煙霧笑語便覺情相親神仙雖遇終離別

千古佳名自傳說天台山水至今存桃源望斷空明月


孫寧

題半塘寺潤公房顧叔明所畫松壁

顧君叔明善寫松妙趣直與韋偃同片縑幅紙不易得
人爭一覩青雙瞳玉巖上人即燦可早躋十地成全功
禪房素壁耀霜雪繪畫未許來庸工叔明對此役意正
捉筆跳叫聲摩空須臾貌作老蛟影毫端瞥若回腥風
隔座時疑翠濤響鈎簾日訝元雲封宿鶴已去落花盡

庭前細雨春濛濛老夫尋幽適相過覽之便覺心神融
酒酣信手為長句醒愧浣花溪上翁

御選明詩卷四十一



總校官庶吉士臣侍朝

校對官檢討臣蕭九成

謄錄監生臣傅瓌芳